

- मुख्यमंत्री भजन लाल शर्मा री सदरत मांय आज जयपुर मांय मंत्रिमंडल अर राज्य मंत्रिपरिषद री मीटिंग व्ही।
- उपराष्ट्रपति जगदीप धनखड़ कह्यो – देश विकसित भारत रो चुनौतीपूर्ण लक्ष्य वां रा संकल्प ऊं हासिल करेला।
- सीकर री एक अदालत साल 2019 रा ऑनर किलिंग मामला मांय मारी ज्यी लड़की रा बाप ने फांसी री सजा सुनायी— दूजा 10 दोषियां ने उम्र कैद।
- काजरी संस्थान रेगिस्तानी हलका मांय अंजीर री खेती रो सफल प्रयोग कीनो।

000

जयपुर मांय आज मुख्यमंत्री भजन लाल शर्मा री सदरत मांय राज्य मंत्रिमंडल अर मंत्रिपरिषद री मीटिंग व्ही। प्रदेश रा सात विधानसभा हलकां मांय उप-चुनाव री आचार संहिता लागण पाछे राज्य मंत्रिमंडल अर मंत्रिपरिषद री आ पहली मीटिंग है। 9 ऊं 11 दिसंबर ताई व्हेवण वाळी राइजिंग राजस्थान इंवेस्टमेंट समिट ऊं पैली व्हे रही ई मीटिंग मांय निवेश ने बधावो देवण वाळी नुवी नीतियां ने मंजूरी मिलण रा आसार है।

000

उपराष्ट्रपति जगदीप धनखड़ कह्यो है के विकसित भारत अब सपनो नी बल्कि चुनौतीपूर्ण लक्ष्य है अर देश वां रा संकल्प ऊं इण ने हासिल करेला। श्री धनखड़ आज नई दिल्ली मांय **विकसित भारत 2047 : नए भारत 3.0 का विजन** मुद्दा माथे राख्यी ज्या एक सम्मेलन मांय आ बात कही। वे कह्यो के देश री माली व्यवस्था अर बुनियादी ढांचा, डिजिटल बुनियादी ढांचा अर डिजिटल पहुंच री अन्तर्राष्ट्रीय मुद्रा कोष, विश्व बैंक अर विश्व आर्थिक मंच कानी ऊं सराहवणा करी ज्यी है। वे देशी सामान काम लेवण सारु वोकल फॉर लोकल माथे जोर दीनो। श्री धनखड़ जनता ऊं ज़रूरत रे मुताबिक साधन काम लेवण सारु ई कह्यो।

वे संसद रा कामकाज मांय अड़चन माथे नाराज़गी जताता थकां कह्यो के संसद जनता री उम्मीदां सांची करण, बहस, संवाद, चर्चा अर विचार री ठौड़ है, जिण ने व्यवधान रो केंद्र नी बणायो जावणो चाहिजे।

000

ओडिशा रा भुवनेश्वर मांय चाल रह्या पुलिस महानिदेशकां अर महानिरीक्षकां रा अखिल भारतीय सम्मेलन मांय आज प्रधानमंत्री नरेन्द्र मोदी ई सिरकत कीनी। सम्मेलन मांय आतंकवाद, वामपंथी उग्रवाद, तटवर्ती सुरक्षा, साइबर अपराध, नशीली चीजां री तस्करी ने रोकण, नुवा आपराधिक कानूनां अर देश री हिफाजत ऊं जुड़्या खास मुद्दां माथे विचार कर्यो जा रह्यो है।

000

प्रदेश रा मेडिकल कॉलेजां ऊं जुड़्या अस्पतालां मांय बेगो ई क्यू मैनेजमेंट सिस्टम लागू कर्यो जावेला। इण री सरुआत जयपुर रा सवाई मानसिंह मेडिकल कॉलेज ऊं जुड़्या कांवटिया अस्पताल अर आयूएचएस मेडिकल कॉलेज ऊं जुड़्या जयपुरिया अस्पताल ऊं करी जावेला। चिकित्सा शिक्षा सचिव अंबरीश कुमार आ जाणकारी दीनी। वे आज कांवटिया अर जयपुरिया अस्पताल रो दौरा कर र वठे मुहैया कराया जा रह्या स्वास्थ्य सुबीतां री जाणकारी लीनी अर व्यवस्थावां मांय सुधार बाबत ज़रूरी हुकम दीना। वे बेहतरीन काम करण वाळा पांच डॉक्टरां अर नर्सिंग कर्मचारियां ने मान पाना दे र नवाज़ा।

000

सीकर मांय साल 2019 रा एक ऑनर किलिंग मामला मांय अपर ज़िला अर सत्र न्यायालय मारी ज्यी लड़की रा बाप ने मौत री सज़ा सुनाई। ई सागे ई 10 और आरोपितां ने उम्रकैद री सज़ा सुनायी ज्यी। आं मांय वां रा काका अर मामा समेत दूजा दोषी शामिल है। अदालत ई मामला मांय आरोपित तीन जणां ने बरी कर दीना। ध्यानजोग है के सीकर ज़िला रा आलोदा गांव मांय 19 साल री एक लड़की रा बाप अर वां रा मददगार मिल र लड़की अर वां रा प्रेमी री हित्या कर दीनी ही। हित्या पाछे लाश जीण माता हलका री डूंगरियां मांय फैंक दीरीजी ही।

000

राज्यपाल हरिभाऊ बागडे कह्यो है के पेड़-पौधां ने बचा र ही पर्यावरण ने बचायो जा सके है। वे आज 'एक पेड़ मां के नाम' अभियान रा तहत जयपुर मांय राख्खी ज्या "ग्रीन आईडल अवार्ड" कार्यक्रम मांय बोल रह्या हा। राज्यपाल कह्यो के रूखड़ा व्हेवण री ठौड़ बिरखा व्हे है, ई कारण सगळां ने रूखड़ा रोप र वां री सार-संभाल करणी चाहिजे। वे अमृता देवी कानी ऊं खेजड़ली मांय रूखड़ां ने बचावण सारु करी ज्या बलिदान ने याद करता थकां कह्यो के आब-ओ-हवा मांय बदलाव रा संकट भर्या ई बगत मांय रूखड़ा ई इन्सान रा भरोसेमंद दोस्त है, ज्यां ऊं जिन्दगी बच सके है।

000

राज्य रा बाड़मेर, जैसलमेर, गंगानगर अर हनुमानगढ़ जिलां मांय अंजीर री खेती करी जा रही है। केंद्रीय शुष्क क्षेत्र अनुसंधान संस्थान-काजरी रा वैज्ञानिक अंजीर रा बारा मांय शोध कर र इण ने थार रा रेगिस्तान मांय उपजावण अर उपज बधावण मांय कामयाबी हासिल कीनी है। काजरी किसानां ने इण री सिखावण देवणो ई सरु कीनो है। अंजीर री साख लेवण वाळां ने प्रति हेक्टेयर 5 ऊं 6 लाख रुप्या री आमदनी व्हेवण लागी है।

000

राइजिंग राजस्थान ग्लोबल इन्वेस्टमेंट समिट ऊं पैली जिला स्तर माथे राख्या जा रह्या निवेशकां रा सम्मेलन मांय न्यारी-न्यारी ठौड़ां निवेश बाबत् करार कर्या जा रह्या है। अलवर मांय केंद्रीय मंत्री अर अलवर रा सांसद भूपेंद्र यादव री मौजूदगी मांय आज राख्खी ज्या जिला स्तर रा निवेशक सम्मेलन मांय 240 निवेशकां सागे करीब 10 हजार 147 करोड़ रुप्या रा करार करी ज्या। ई मौके केंद्रीय मंत्री यादव कह्यो के शिक्षा, पर्यटन, ऑटोमोबाइल, केमिकल अर एग्रो फूड सेक्टर मांय करीब 100 हजार करोड़ रुप्या रा करार करी ज्या है, जो अलवर रा विकास मांय मील रा पत्थर साबित व्हेला।

000

जयपुर मांय आवता महीना व्हेवण वाळी राइजिंग राजस्थान ग्लोबल इन्वेस्टमेंट समिट ऊं पैली राज्य सरकार री ओर ऊं रोजीना कर्या जा रह्या संकल्पां री कड़ी मांय सरकार आज मोटा अनाज ने बधावो देवण रो संकल्प लीनो है। मुख्यमंत्री भजनलाल शर्मा सोशल मीडिया रे जरिए आ जाणकारी दीनी। वे कह्यो के सेहत अर स्वाद राइजिंग राजस्थान ग्लोबल इन्वेस्टमेंट समिट रो आधार व्हेला। ई सारु समिट मांय स्वस्थ राजस्थान रो संदेश देता थकां मोटा अनाज ऊं बणबा वाळा व्यंजन ने बधावो दियो जावेला। ध्यानजोग है के इण ऊं पैली मुख्यमंत्री समिट रा उदघाटन जळसा मांय सूरज री रोशनी ऊं बणी बिजली ई काम लेवण अर हाथ री कारीगरी ने बधावो देवण रो संकल्प जतायो है।

000

भरतपुर रेलवे टेसन माथे **अमृत भारत स्टेशन** योजना रा तैत मंजूर करी ज्या विकास रा कामां मांय ऊं करीब 46 फीसदी पूरा व्हे ग्या है। योजना रा तैत ई टेसन सारु 31 करोड़ 14 लाख रुप्या रा काम मंजूर करी ज्या है। आं मांय प्रवेश पोर्च, हाई लेवल प्लेटफार्म, कवर ओवरशेड अर शौचालय ने बेहतर बणावण समेत न्यारा-न्यारा काम भेळा है। उत्तर पश्चिम रेलवे रा राजगढ़ टेसन माथे ई अमृत भारत स्टेशन योजना रा तैत विकास रा काम कराया जा रह्या है।

वठे पैदल पटरियां पार करण सारु 12 मीटर चौडो पुल बणायी ज्यो है। उत्तर पश्चिम रेलवे रा मुख्य जनसंपर्क अधिकारी कैप्टन शशि किरण बतायो के ई योजना रा तैत उत्तर पश्चिम रेलवे रा 77 टेसनां माथे विकास रा काम कराया जा रह्या है। ई बीचे श्रीगंगानगर मांय करीब आठ साल ऊं बंद आजाद सिनेमा रेलवे फाटक हेटे पुलिया बणायी जावेला। ई सारु केन्द्र सरकार 30 करोड़ रुप्या मंजूर कीना है।

000

काल विश्व एड्स दिवस मणायो जावेला। ई सिलसिला मांय आज केकड़ी रा सरकारी अस्पताल मांय एड्स जागरूकता शिविर लगायी ज्यो। पी.एम.ओ. डॉ. नवीन जांगीड़ बतायो के एड्स, संक्रमित खून, दूषित सुई या किण ई एच.आई.वी. पॉजिटिव जणा रा संपर्क मांय आवण ऊं व्हे है। पाली मांय आज सिंज्यां एड्स रा प्रति जागरूकता फैलावण रा मकसद ऊं राजकीय बांगड़ अस्पताल ऊं सूरजपोल चौराहा ताई डॉक्टरां अर नर्सिंग कर्मचारियां री ओर ऊं कैंडल मार्च निकाळबा रो कार्यक्रम है।

000

पाली मांय ठंड री सरुआत सागे ई परदेसी परिंदा आवण लाग्या है। म्हाणा खबरनवीस बतायो के लाखोटिया उद्यान रा तळाव मांय साइबेरिया, मंगोलिया अर पोलैण्ड समेत न्यारा-न्यारा देशां ऊं आया भांत-भांत रा परिंदां ने देख र लोग घणा राजी निजर आ रह्या है। दूजी कानी टोंक जिला रा देवली मांय परिंदां रे आराम करण सारु बोरड़ा गणेश जी मंदिर परिसर मांय पक्षी विश्राम घर बणायी ज्यो है। जमीं ऊं ऊंचा बणायी ज्या ई पक्षी विश्राम घर मांय एके सागे 120 परिंदा आराम कर सकेला।

000

ब्यावर मांय मिनी सचिवालय बणावण सारु जिला कलेक्टर सामान्य प्रशासन विभाग ने 3 हेक्टेयर ऊं बत्ती ज़मीं आवंटित कीनी है। ओ मिनी सचिवालय ब्यावर तहसील रा दौलतपुरा बलाईयान गांव मांय बणायो जावेला। ओ मिनी सचिवालय बण जावण ऊं सरकारी कामां मांय तेज़ी आवेला।

000

भरतपुर मांय दो दिन रो महिला कुश्ती दंगल आज सरु व्ह्यो। इण मांय राजस्थान , उत्तर प्रदेश, मध्य प्रदेश, हरियाणा अर दिल्ली री 100 ऊं बत्ती महिला पहलवान सिरकत कर रही है। दंगल रो उद्घाटन विधायक डॉ. सुभाष गर्ग कीनो। काल सेमीफाइनल अर फाइनल मुकाबला खेल्या जावेला।

000

स्वास्थ्य मंत्रालय राज्यां अर केंद्र रा राज वाळा प्रदेशां ने सांप कानी ऊं डस लेवण रा मामलां अर वां रे कारण व्हेवण वाळी मौतां ने राज्य लोक स्वास्थ्य अधिनियम अर दूजा प्रावधानां रा तहत 'अधिसूचित रोग' मानण सारु कह्यो है। ई बाबत् केंद्रीय स्वास्थ्य सचिव पुण्य सलिला श्रीवास्तव राज्यां अर केंद्र रा राज वाळा प्रदेशां रा मुख्य सचिवां अर अतिरिक्त मुख्य सचिवां ने कागद लिख्यो है। वे बतायो के सांप कानी ऊं डस लेवण रा मामलां री रोकथाम अर वां माथे काबू करण सारु राष्ट्रीय कार्य योजना चलायी ज्यी है, जिण रा तैत साल 2030 ताई सांप कानी ऊं डस लेवण रे कारण व्हेवण वाळी मौतां री तादाद आधी करणो तैय करी ज्यो है।

000